

國朝耆獻類徵初編卷百十九目錄

詞臣五

徐鉉

尤侗

子珍

范必英

崔如岳

張鴻烈

李澄中

方象瑛

毛奇齡

吳任臣

曹禾

高詠

嚴繩孫

A blank page from a traditional Chinese ledger or account book, featuring ten vertical columns defined by black lines.

國朝耆獻類徵初編卷百十九

通奉大夫前署江西巡撫江西布政使司布政使湘陰李桓輯

詞臣五

徐鉉

徐鉉吳江人康熙十八年由國學生薦舉博學鴻儒試列二等授檢討會當外轉遽乞歸後以原官起用不就卒年七十三鉉好古博學弱冠天才駿發搖筆數千言其詩始尙華秀比壯遊與四方豪雋相切劘格調一變成南州草堂集三十卷又嘗刻菊莊樂府崑山葉方藹稱其絳麗幽深耐人尋味朝鮮貢使仇元吉見之以金餅購去貽詩云中朝攜得菊莊詞讀罷煙霞照海湄北宋風流

何處是一聲鐵笛起相思
鉞旣工倚聲因輯詞苑叢談十二卷
援据詳明具有鑒裁

右 國史館本傳

徐鉞字電發吳江人故又自號虹亭少受業宋旣庭徵君門旣庭經術湛深學徒幾以千計虹亭獨英英秀絕朱長孺見而奇之曰此今之郭功甫也世有王荊公定當激賞旣屢戰南北闡不利則襆被四出敦槃縞紵徧吳越齊魯之鄉芙蓉幕下絲竹堂前城北徐公聲華籍甚歲己未 召試文學之士於體仁閣下擢高等者五十人同日入史館而虹亭與焉所著俞戚劉馬諸大將傳尤高潔縝密一時推大作手徒以賦性蕭閒不久遂左遷以去歸里後

益鍵戶讀書著述不輟亦時而爲豫章閩越之遊篇章益富如是者又十年會 聖祖皇帝南巡偕在籍諸臣接駕 詔復原官兼有 御書之賜所云桑榆之晚照歟虹亭以詩名江表三十餘年早歲體尙華秀壯遊而後與四方豪雋相切劘格調一變其自述云新詩學放翁誰人畫團扇無俟記室品題固可知其得力之所自矣又雅擅倚聲學所製菊莊詞流入朝鮮有會甯都護官仇元吉用金一餅購去題一絕贈之曰中朝攜得菊莊詞讀罷煙霞照海湄北宋風流何處是一聲鐵笛起相思此與雞林相國市白香山詩西南夷弓衣織梅聖俞春雪句者何異因並記錄以志詞林之佳話云

右小傳鄭方坤撰

虹亭爲龔端毅賞識端毅臨沒謂梁真定曰負才如徐君可使之不成名耶於此見端毅之愛才而虹亭之見重於端毅實有使之心折者也生平填詞極工晚歲成本事詩遠地購求比於洛陽紙貴

右國朝詩別裁集小傳沈德潛撰

詞苑叢談徐鉉撰是書專輯詞家故實分體製音韻品藻紀事辨正諧謔外編七門採摭繁富援據詳明足爲論詞者總匯

右四庫提要張維屏錄

尤侗 子珍

尤侗江蘇長洲人少博聞強記弱冠補諸生才名籍甚歷試於鄉
不售以貢謁選除直隸永平府推官吏治精敏不畏強禦怙勢梗
法者逮治無所縱坐撻旗丁鐫級歸康熙十八年薦舉博學鴻儒
科試列二等授檢討分修明史撰志傳多至三百篇居三年告歸
先是侗所作詩文流傳禁中世祖章皇帝以才子目之後入翰
林聖祖仁皇帝稱爲老名士天下羨其榮遇比於唐李白云三
十八年春聖駕南巡至蘇州侗獻平朔頌萬壽詩上嘉焉
賜御書鶴棲堂扁額四十二年駕復幸吳賜御書一幅卽
家授侍講蓋異數也侗性寬和與物無忤汲引後進一才一藝獎

借不容口兄弟七人友愛無閒白首如垂髫卒年八十七其詩詞
古文才既富贍復多新警之思體物言情精切流麗每一篇出傳
誦徧人口著述甚富全集五十卷餘集七十卷鶴棲堂集十卷

右 國史館本傳

先生姓尤氏諱侗字同人更字展成別字悔庵又曰艮齋晚自號
西堂老人西堂者先生讀書之所也先世家無錫遠祖袤以政事
文學著南渡初詩家所稱尤蕭范陸是己子孫世登臚仕載萬柳
溪邊舊話其後轉徙長洲之斜塘曾祖某有隱德祖某舉鄉飲賓
考淪國子監生 敕贈徵仕郎翰林院檢討亦兩舉鄉飲賓妣孺
人鄭先生少日博聞強記有才名補學官弟子歷試於鄉不利貢

於廷謁選除永平府推官不畏強禦坐撻旗丁降調康熙十七年春天子倣古制科取士或薦先生於朝召試體仁閣下上親擢五十人悉除翰林纂修明史同日入院先生最長以齒序四十九人皆坐其下畱史局三年分撰志傳多至三百篇覃恩授徵仕郎子珍以進士出身改庶吉士先生乃告歸家居以詩文縑素請者盈庭戶先生揮灑不倦有求必滿其意同時汪編修琬居堯峰以古文自矜少可多怪見俗子議文章者恆面斥之以是人多畏縮咸樂先生之和易也歲己卯天子南巡先生入見御書鶴棲堂扁額以賜時先生年八十有二矣猶康彊善飯暇相地於官山之陰築生壙自爲之誌納丙舍曰艸艸山房俾子分

書子嘗以天台萬年藤杖奉先生并作歌以贈先生喜劇然猶未
窘於步不藉扶持也歲癸未 天子復南巡晉先生官侍講甲申
六月日以疾卒距生明萬歷四十六年閏月日享年八十有七配
曹孺人有賢行官右春坊右贊善兼翰林院檢討者長子珍也次
瑞縣附學生女三人一嫁縣學生湯萬煒一嫁陝西提學按察僉
事候補布政司參議陸德元一嫁縣學生金秉寬孫男一人世求
以歲貢生考授知縣以能詩聞女五人俱配士族曾孫一人先生
名雖未登甲乙榜早爲文社倫魁弟子著錄者多大學士崑山徐
公元文其一也所作詩文流傳禁籞 世祖惜其才命相妨終受
聖主之知官之翰苑屢承 殊渥今年春彝尊詣杭州偕前輩

德清徐公倬謁見 皇太子於行殿 令旨賜坐謂曰老成易謝
茲來又失一尤展成矣字而不名洵異數也已先生著述甚富所
撰西堂雜組觀者胥悅奉爲兔園冊晚輯艮齋雜記學者服其雅
馴全集五十四卷餘集七十卷鶴樓堂稟十卷俱鏤版行於世銘
曰

士也懷才或不售遭逢 聖世終旁求圭璋特達自有期鶴書

召君六十餘俾入史局掌詞曹君之才大筆不休有若軋軋機絲
抽趨庭有子登亨衢遺榮辭老返衡茅難進易退世所高君於故
里恣逍遙水哉之軒蘭葉舟琴瑟几杖官山幽達天知命故不憂
鶴樓堂深 御墨畱人生百歲語本虛八十有七齒已優著史況

足名千秋君今含笑歸山邱吾銘維實言不浮

右墓誌銘朱彝尊撰

先生姓尤氏名侗字同人一字展成號悔庵晚號艮齋宋相文簡公表之後自無錫遷長洲世有潛德先生生而穎異童年徧誦子史騷選弱冠補諸生名籍甚吳越閒修文社俊髦集者常數百人咸心折先生謂必速化顧久困場屋乃益肆力於詩詞古文才旣富瞻復多新警之思體物言情精切流麗讀之使人心開目明每一篇出傳誦徧人口賈人輒梓行之勿能止也以鄉貢謁選除永平推官人謂文士未必諳簿書而先生吏治精敏猾胥豪民斂手帖息怙勢梗法者逮治無所縱坐撻旗丁鐫級歸廷臣多欲薦起

之輒謝勿應而其文流傳禁中 章皇帝覽而稱善數爲貴近臣
稱賞之徐公立齋初及第 上知爲先生門人一日從幸南海子
上忽駐馬問爾師尤侗年幾何以何事降調當補何官垂詢再
三復語未陳禪師士子多有才高淹抑者如新狀元徐元文之師
尤侗最工爲文僅以鄉貢入仕旋復罷官豈非命耶未陳因言君
相能造命 上曰朕意亦然蓋有意召用之矣無何 世祖賓天
先生自傷數奇命蹇分老田閒康熙戊午年 詔舉博學鴻儒公
卿交章推薦 召試保和殿前擢置高等授翰林檢討纂修明史
先生感不世 知遇思以文章上報 國恩屏絕應酬覃心史事
分撰列傳三百餘篇藝文志五卷別採明代故實倣李西涯體作

樂府數十篇又作外國竹枝詞百餘首其他論撰尤多居三年長子珍成進士選爲庶常先生慨然曰知足不辱知止不殆吾年踰六十子幸成名可以休矣遂決意告歸歸而鍵戶著書學益精深文益雅健人之踵門求文者無虛日先生亦應之不窮所著西堂雜組艮齋雜記及文集餘集共百餘卷盛行於世常自嫌過多欲刪定爲一編未暇也性度寬和與物無忤喜汲引後進一才一藝獎借不容口兄弟七人友愛無閒白首如垂髫配曹夫人賢明淑慎鄉黨稱爲禮宗先生宦遊四方夫人綜理家政教其子甚嚴卒能成名夫人歿先生悲甚作悼亡數十篇名哀絃集子珍旣入詞林累遷宮贊年壯學富方當嚮用時念親老單居請告歸養遂不

復赴補清修恬澹父子同風天下高之己卯春 大駕南巡至吳
郡先生獻平朔頌 萬壽詩 天子嘉焉書鶴棲堂三大字以賜
癸未春 駕復幸吳 賜先生御書一幅卽家拜侍講實異數也
先生少攻文辭中年學道晚而脩然類有德者常言不講學而味
道不梵誦而安禪不導引而攝生此吾所異於世人也築生壙於
官山自爲之誌構丙舍其旁幅巾鶴氅逍遙林野如世外人年八
十七而終未自童丱時卽聞先生盛名年輩懸絕辱與同薦同官
同局修纂忝爲末契又謬許余能古文詞故從其伯子之請爲作
傳

贊曰漢武帝讀司馬相如辭賦恨不與同時唐德宗手書韓翃詩

除知制誥世稱奇遇艮齋始蒙 章皇帝歎賞繼被 今上褒擢
受知 兩朝恩禮終始豈不尤榮古來文人類多浮薄或貪榮躁
進或揚己傲物先生獨篤厚謙沖恬於榮進有古君子長者風王
元美傷才士多貧窮卑賤甚至天年無子故有文章九命之說先
生一一與之相反以是知文人多窮容有自致之道非盡天之阨
之如先生天未始不厚之也

右傳潘耒撰

尤侗字展成別字悔庵晚自號西堂老人西堂者其所讀書處也
少日博聞強記有才名補學官弟子歷試於鄉不利貢於 廷除
永平府推官坐撻旗丁降調康熙十七年以博學鴻儒徵 召試